

求闕齊弟子記

求闕齋弟子記卷二十六

東湖王定安集

家訓下

諭二子

居家之道惟崇儉可以久長處亂世尤以戒奢侈爲第一要義
衣服不宜多製尤不宜大鑲大緣過於絢爛爾教導諸妹敬聽
父訓自有可久之理

世家子弟最易犯一奢字傲字不必錦衣玉食而後謂之奢也
但使皮袍呢鞋俯拾卽是輿馬僕從習慣爲常此卽日趨於奢
矣見鄉人則嗤其樸陋見雇工則頤指氣使此卽日趨於傲矣

書稱世祿之家鮮克由禮傳稱驕奢淫佚寵祿過也京師子弟之壞未有不由於驕奢二字者爾與諸弟其戒之

作人之道聖賢千言萬語大氏不外敬恕二字仲弓問仁一章言敬恕最爲親切自此以外如立則見其參於前也在與則見其倚於衡也君子無眾寡無小大無敢慢斯爲泰而不驕正其衣冠儼然人望而畏斯爲威而不猛是皆言敬之最好下手者孔言欲立立人欲達達人孟言行有不得反求諸己以仁存心以禮存心有終身之憂無一朝之患是皆言恕之最好下手者爾心境明白於恕字或易著功於敬字則宜勉強行之此立德之基不可不謹

余在外無他慮總怕子姪習於驕奢逸三字家敗離不得个奢字人敗離不得个逸字討人嫌離不得个驕字

家中萬事余俱放心惟子姪須有一勤字一謙字謙者驕之反也勤者佚之反也驕奢淫佚四字惟首尾二字尤宜切戒

天地間惟謙謹是載福之道驕則滿滿則傾矣凡動口動筆厭人之俗嫌人之鄙議人之短發人之覆皆驕也無論所指未必果當即使一一切當已爲天道所不許

爾等總宜以勤儉二字自惕而接物出以謙慎凡世家之勤不儉者驗之於內眷而畢露余在家深以婦女之奢逸爲慮爾二人立志撐持門戶亦宜自端內教始也

我在家並未帶一僕人蓋居鄉卽全守鄉間舊樣子不參半點
官宦習氣

昔吾祖星岡公最講求治家之法第一早起第二打掃潔淨第
三誠修祭祀第四善待親族鄰里凡親族鄰里來家無不恭敬
款接有急必周濟之有訟必排解之有喜必慶賀之有疾必問
有喪必弔此四事之外於讀書種菜等事尤爲刻刻留心故余
近寫家信常常提及書蔬魚猪四端者蓋祖父相傳之家法也
爾現讀書無暇此八字縱不能盡親自經理而亦不可不識得
此意請朱建四先生細心經理八者缺一不可其誠修祭祀一
端則必須爾母隨時留心凡器物第一等好者留作祭祀之用

飲食第一等好者亦備祭祀之需凡人家不講究祭祀縱然興旺亦不久長

省雇園丁來家宜廢田一二坵用爲菜園吾現在營課勇夫種菜每塊土約三丈長五尺寬窄者四尺餘寬務使種菜及摘蔬之時人足行兩邊溝內不踐菜土之內溝寬一尺六寸足容便桶大小橫直有溝有渰下雨則水有所歸不使積潦傷菜四川菜園極大溝渰終歲引水長流頗得古人井田遺法吾鄉一家園土有限斷無橫溝而直溝則不可少吾鄉老農雖不甚精猶頗認真老園則全不講究我家開此風氣將來荒山曠土盡可開墾種百穀雜蔬之類如種菜亦獲利極大吾鄉無人試行吾

家若有山地可試種之

吾家門第鼎盛而居家規模禮節總未認真講求歷觀古今世家久長者男子須講求耕讀二事女子須講求紡績酒食二事斯干之詩言帝王居室之事而女子重在酒食是議家人卦以二爻爲主重在中饋內則一篇言酒食者居半故余屢教兒婦諸女親主中饋後輩視之若不要緊此後還鄉居家婦女縱不能精於烹調必須常至廚房必須講求作酒作醢醢小菜換茶之類爾等亦須留心於時蔬養魚此一家興旺氣象斷不可忽紡績雖不能多亦不可間斷大房唱之四房皆和之家風自厚矣

余所存緝私經費存後路糧台者已有三萬餘金余家於此項不可取絲毫爾等密商之作梅先生雨亭方伯設法用去凡散財最忌有名總不可使一人知

一有名便有許多窒礙或提作善後局之零用或留作報銷之

部費不可捐爲善舉費

余生平以盲大名爲憂若清廉之名尤恐折福也

爾等進京可至雨亭處取養廉數千金作爲途費餘者仍寄雨亭處另款存庫余罷官後或取作終老之資已極豐裕矣

江西所欠養廉已解到否爾帶數千金作北上途費其餘萬數千金寄存江甯藩庫爲余還山終老之資已爲苟完苟美切不可不知足也後路糧台所存緝私經費有三萬餘金卽存台作報銷部費除雨亭作梅少崖外別不使一人知之最不着迹此

外淮北公費尙有應解余者將來亦作報銷部費余奏調七人中或有缺途費者在其中提送若干請兩梅酌度此外不更動用絲毫矣

三月十七日果成行否沿途州縣有送迎者除不受禮物酒席外爾兄弟遇之須有一種謙謹氣象勿自恃其清介而生傲惰氣象也余近年默省之勤儉剛明忠恕謙渾八德曾爲澤兒言之宜轉告與鴻兒就中能體會一二字便有日進之象澤兒天質近薄吾嫌其過於玲瓏剔透宜從渾字上用些工夫鴻兒則從勤字上用些工夫用功亦不可拘苦須探討些趣味出來方有資深逢源之候

京中絕不應酬計每月用錢若干兒婦諸女果每日紡績有常課否吾近夜飯不用葷菜以肉湯炖蔬菜一二種令極爛如羹美味無比必可以資培養試炖與爾母食之後輩則夜飯不葷專食蔬而不用肉湯亦養生之宜且崇儉之道也顏黃門顏氏家訓作於亂離之世張文端聰訓齋語作於承平之世所以教育家者極精爾兄弟各覓一冊常常閱習則日進矣

養生無甚可恃之法其確有益者曰每夜洗腳曰飯後干步曰黎明吃白飯一碗不沾點菜曰睡有常時曰靜坐有常時紀澤脾不消化此五事中能做三四事卽勝於吃藥紀鴻及杏生等亦可酌做一二事余僅辦洗腳一事已覺大有裨益

前信言養生五法皆擇其全無流弊者尙有一法曰少惱怒即
八本中之一尤爲養生要訣爾輩慎之至於自立之道則看讀
寫作缺一不可不多看則太陋不溫讀則易忘不善寫則如身
之無衣山之無木不能作則如人之啞不能言馬之跛不能行
有是四者則終身榮而且貴無是四者則終身辱而且賤貴賤
不盡係乎科名官階也無形之賤乃真賤耳吾嘗慮爾兄弟體
弱能於養生六法之中習得三四事則弱者自變而強又慮爾
等不能自立若於四者之中習得二三事則樹立必有可觀者
矣

余近來衰態日增眼光日蒙然每日諸事有恆不改常度爾等

身體皆弱前所示養生五訣已行之否以後當添不輕服藥一
層共六訣矣既知保養卻宜勤勞家之興衰人之窮通皆由於
勤惰卜之爾等習勤有恆則諸弟七八人皆學樣矣

吾於凡事皆守盡其在我聽其在天二語卽養生之道亦然體
强者如富人因戒奢侈而益富體弱者如貧人亦因節嗇而自
全節嗇非獨食色之性也卽讀書用心亦宜儉約不使太過余
入本扁中以少怒惱爲本又嘗教爾等胸中不宜太苦須活潑
潑地養得一段生機亦去惱怒之義也既戒惱怒又知節嗇養
生之道已盡其在我者矣此外壽之長短病之有無一概聽其
在天不必多生妄想去計較他凡多服藥餌求禱神祇皆妄想

也吾於醫藥禱祀等事皆記星岡公之遺訓而稍加推闡教示後輩爾可常常與家中內外言之

澤兒肝氣痛病已全好否亦不應有肝鬱之症或由元氣不足諸病易生身體本弱虧損太過上次函示以節齋之道用心宜約爾曾體驗否張文端公所著聰訓齋語皆教子之言其中言養身擇友觀玩山水花竹純是一片太和生機爾宜常常省覽鴻兒體亦單弱亦宜常看此書吾教爾兄弟不在多書但以聖祖之庭訓格言張公之聰訓齋語二種爲教句句皆吾肺腑所欲言以後在家則時養花竹出門則飽看山水環金陵百里內外可徧遊也鴻兒於算學書切不可再看讀他書亦以半日

爲衡未刻以後卽宜歇息游觀古人以懲忿窒慾爲養生要訣
懲忿卽吾前信所謂少惱怒也窒慾卽吾前信所謂知節齋也
因好勝而用心太過亦慾之類也

爾輩身體皆弱每日須有靜坐養神之時有發憤用功之時一
張一弛循環以消息之則學可進而體亦強矣

余以生平學術百無一成故老年猶思補救一二爾兄弟總宜
在五十以前將應看之書看畢免致老大傷悔也

余卽日前赴天津查辦毆斃洋人焚毀教堂一案外國性情凶
悍津民習氣浮囂俱難和叶將來構怨興兵恐致激成大變余
此行反復籌思殊無良策余自咸豐三年募勇以來卽自誓效

命疆場今老年病軀危難之際斷不肯吝於一死以自負其初心恐邂逅及難而爾等諸事無所稟承茲略示一二以備不虞余若至長逝靈柩自以由運河搬回江南歸湘爲便中間雖有臨清至張秋一節須改陸路較之全行陸路者差易去年由海船送來之書籍木器等過於繁重斷不可全行帶回須細心分別去留可送者分送可毀者焚毀其必不可棄者乃行帶歸毋貪瑣物而花途費其在保定自製之木器全行分送沿途謝絕一切概不收禮但水陸略求兵勇護送而已

余歷年奏摺令夏吏擇要鈔錄今已鈔一多半自須全行擇鈔鈔畢後存之家中留於子孫觀覽不可發刻送人以其間可存

者絕少也余所作古文黎莼齋鈔錄頗多頃黎已照鈔一分寄
余處存稿此外黎所未鈔之文寥寥無幾尤不可發刻送人不
特篇幅太少且少壯不克努力志亢而才不足以副之刻出適
以彰其短耳如有知舊勸刻余集者婉言謝之可也至囑

余生平略涉儒先之書見聖賢教人修身千言萬語而要以不
伎不求爲重伎者嫉賢害能妬功爭寵所謂急者不能修忌者
畏人修之類也求者貪利貪名懷土懷惠所謂未得患得既得
患失之類也伎不常見每發露於名業相牟勢位相埒之人求
不常見每發露於貨財相接仕進相妨之際將欲造福先去伎
心所謂人能充無欲害人之心而仁不可勝用也將欲立品先

去求心所謂人能充無穿窬之心而義不可勝用也伎不去滿
懷皆是荆棘求不去滿腔日即卑汗余於此二字常加克治恨
尙未能掃除淨盡爾等欲心地乾淨宜於此二者痛下工夫並
顧子孫世世戒之附作伎求詩二首錄左

伎求詩

善莫大於恕德莫凶於妬妬者妾婦行瑣瑣奚比數已拙忌
人能已塞忌人遇已若無事功忌人得成務已若無黨援忌
人得多助勢位苟相敵畏偏又相惡已無好聞望忌人文
名著已無賢子孫忌人後嗣裕爭名日夜奔爭利東西驚但
期一身榮不惜他人汗聞災或欣幸聞禍或悅豫問渠何以

然不自知其故爾室神來格高明鬼所願天道常好還嫉人
還自誤幽明叢詬忌乖氣相迥互重者裁汝躬輕亦減汝祚
我今告後生悚然大覺寤終身讓人道曾不失寸步終身祝
人善曾不損尺布消除嫉妒心普天零甘露家家獲吉祥我
亦無恐怖

右不伎

知足天地寬貪得宇宙隘豈無過人姿多欲爲患害在約每
思豐居困常求泰富求千乘車貴求萬釘帶未得求速償既
得求勿壞芬慶比椒蘭磐固方泰岱求榮不知屢志亢神愈
忤歲煥有時寒日明有時晦時來多善緣運去生灾怪諸福
不可期百殃紛來會片言動招尤舉足便有礙戚戚抱殷憂

精爽日凋瘵矯首望八荒乾坤一何大安榮無遽欣患難無
遽愁君看十人中八九無倚賴人窮多過我我窮猶可耐而
况處夷塗奚事生嗟愴於世少所求俯仰有餘快俟命堪終
古曾不願乎外

右不求

歷覽有國有家之興皆由克勤克儉所致其衰也則反是余生
平亦頗以勤字自勵而實不能勤故讀書無手鈔之冊居官無
可存之牘生平亦好以儉字教人而自問實不能儉今署中內
外服役之人厨房日用之數亦云奢矣其故由於前在軍營規
模宏濶相沿未改近因多病醫藥之資漫無限制由儉入奢易
於下水由奢反儉難於登天在兩江交卸時尙存養廉二萬金

在余初意不料有此然似此放手用去轉瞬卽已立盡爾輩以
後居家須學陸梭山之法每月用銀若干兩限一成數另封秤
出本月用畢只准贏餘不准虧欠衙門奢侈之習不能不徹底
痛改余初帶兵之時立志不取軍營之錢以自肥其私今日差
幸不負始願然亦不願子孫過於貧困低顏求人惟在爾輩力
崇儉德善持其後而已

孝友爲家庭之祥瑞凡所稱因果報應他事或不盡驗獨孝友
則立獲吉慶反是則立獲殃禍無不驗者吾早歲久宦京師於
孝養之道多疏後來展轉兵間多獲諸弟之助而吾毫無裨益
於諸弟余兄弟姊妹各家均有田宅之安大抵皆九弟扶助之

力我身歿之後爾等事兩叔如父事叔母如母視堂兄弟如手足凡事皆從省齋獨待諸叔之家則處處從厚待堂兄弟以德業相勸過失相規期於彼此有成爲第一要義其次則親之欲其貴愛之欲其富常常以吉祥善事代諸昆季默爲禱祝自當神人共欽溫甫季洪兩弟之死余內省覺有慚德澄侯沅甫兩弟漸老余此生不審能否相見爾輩若能從孝友二字切實講求亦足爲我彌縫缺憾耳

余生不好讀史記漢書莊子韓文四書而尤喜看漢書爾輩能看漢書是余所欣慰之一端也看漢書有兩種難處必先通於小學訓詁之書而後能識其假借奇字必先習於古文辭章之

學而後能讀其奇篇奧句於小學古文兩者未曾入門則漢書中不得識之字不能解之句多矣欲通小學須看段氏說文注經籍纂詁二書王懷祖先生讀書雜誌中於漢書之訓詁極爲精博爲魏晉以來釋漢書者所不能及欲明古文須略看文選及姚姬傳之古文辭類纂二書班孟堅最好文章故於賈誼董仲舒司馬相如東方朔司馬遷楊雄劉向匡衡谷永諸傳皆全錄其著作卽不以文章名家者如賈山鄒陽等四人傳嚴助朱買臣等九人傳趙充國屯田之奏韋立成議禮之疏以及貢禹之章陳湯之奏獄皆以好文之故悉載鉅篇如賈生之文旣著於本傳復載於陳涉傳食貨志等篇子雲之文旣著於本傳復

載於匈奴傳王貢傳等篇極之充國贊酒箴亦皆錄入各傳蓋
孟堅於典雅瓌璋之文無一字不甄采爾將十二帝紀閱畢後
且先讀列傳凡文之爲昭明暨姚氏所選者卽細心讀之卽不
爲二家所選則另行標識之若小學古文二端略得塗徑其於
讀漢書之道思過半矣

凡看書之道須以勤敏行之每日至少亦須看二十葉不必惑
於在精不在多之說今日半頁明日數頁又明日耽閣間斷或
數年而不能畢一部如煮飯然歇火則冷小火則不熟須用大
柴大火乃易成也

爾輩看文選宜略抄典故藻采分類抄記以爲饋貧之糧文選

前數本係漢人之賦極難領會後半則易看矣余所見友朋中無能知漢賦之意味者爾不能記憶亦由於不知其意味此刻不必求記將來若能識得意味自可漸記一二余向來記性極壞近老年反略好些由於識得意味也

吾所論看文選之法宜先明訓詁觀漢魏文人有二端最不可及一日訓詁精確二日聲調鏗鏘說文訓詁之學自中唐以後人多不講宋以後說經尤不明故訓及至我

朝巨儒始通小學段茂堂王懷祖兩家遂精研乎古人文字聲音之本乃知文選中古賦所用之字無不典雅精當爾輩若能熟讀段王兩家之書則知眼前常見之字凡唐宋文人誤用惟

六經不誤用文選中漢賦亦不誤也卽以文選中所載三都賦言之如蔚若相如矚若君平以一蔚字該括相如之文章以一矚字該括君平之道德此雖不盡關乎訓詁亦足以見其下字之不苟矣至聲調之鏗鏘如開高軒以臨山列綺窗而瞰江碧出萋宏之血鳥生杜宇之魂洗兵海島刷馬江洲數軍實乎桂林之苑饗戎旅乎落星之樓等句音響節奏皆後世所不能及爾看文選能從此二字用心則漸有入理處矣

余觀漢人詞章未有不精於小學訓詁者如相如子雲孟堅於小學皆專著一書文選於此三人之文著錄最多余於古文志在效法此三人並司馬遷韓愈五家以此五家之文精於小學

訓詁不妄下一字也凡奇僻之字雅故之訓不手抄則不能記
不摹倣則不慣用自宋以後能文章者苦不通小學

國朝諸儒通小學者又不能文章余早歲窺此門徑因人事太
繁又久歷戎行不克卒業至今用爲疚憾爾等天分長於看書
短於作文此道太短則於古書之用意行氣必不能看得諦當
目下宜從短處下工夫專肆力於文選手抄摹倣二者皆不可
少待文筆稍有長進則以後詁經讀史事事易於着手矣
行氣爲文章第一義卿雲之跌宕昌黎之崛強尤爲行氣不易
之法宜先於韓公倔強處揣摩一番

余所選十八家詩凡十厚冊爾等要讀古詩魏漢六朝取余所

選曹阮陶謝鮑謝六家專心讀之至於開拓心胸擴充氣魄窮極變態則非唐之李杜韓白宋金之蘇黃陸元八家不足以盡天地古今之奇觀爾之質性雖與八家者不相近而要不可不悉心研究一番實六經外之鉅製文字中之尤物也

爾問五箴末句敢告馬走凡箴以虞箴爲最古其末曰獸臣司原敢告僕夫意以獸臣有司郊原之責吾不敢直告之但告其僕耳揚子雲倣之作州箴冀州曰牧臣司冀敢告在陛揚州曰牧臣司揚敢告執籌荊州曰牧臣司荆敢告執御青州曰牧臣司青敢告執矩徐州曰牧臣司徐敢告僕夫余之敢告馬走卽此類也走猶僕也

見文選司馬遷答任安書注班固答賓戲注

朱子作敬箴曰敢告

靈臺則非僕御之類於古人漸有歧誤矣凡箴以官箴爲本如韓公五箴程子四箴朱子各箴范浚心箴之屬皆失本義余亦相沿失之

作文宜摹仿古人間架詩經造句之法無一句無所本左傳之文多現成句調揚子雲爲漢代文宗而其太元摹易法言摹論語方言摹爾雅十二箴摹虞箴長揚賦摹難蜀父老解嘲摹客難甘泉賦摹大人賦劇秦美新摹封禪文諫不許單于朝書摹國策信陵君諫伐韓幾於無篇不摹卽韓歐曾蘇諸巨公之文亦皆有所摹擬以成體段爾以後作文作詩賦均宜心有摹倣而後間架可立其收效較速其取徑較便

余惟文章之可以道古可以適今者莫如作賦漢魏六朝之賦名篇鉅製具載於文選余嘗以西征蕪城及恨別等賦示爾矣其小品賦則有古賦識小錄律賦則有

本朝之吳穀人顧耕石陳秋舫諸家爾若學賦可於每三八日作一篇大賦或數千字小賦或僅數十字或對或不對均無不可此事比之八股文略有興趣不知爾性與之相近否

四言詩最難有聲響有光芒往往爾雅有餘精光不足揚子雲之州箴百官箴諸四言刻意摹古亦乏作作之光淵淵之聲余生平於古人四言最好韓公之作如祭柳子厚文祭張署文進學解送窮文諸四言固皆光如皎日響如春霆卽其他凡墓志

之銘詞及集中如淮西碑元和聖德各四言詩亦皆於奇崛之中迸出聲光其要不外意義層出與筆仗雄拔而已自韓公而外則班孟堅漢書敘傳一篇亦四言之最雋雅者爾將此數篇熟讀成誦則於四言之道自有悟境

韓公五言詩本難領會且先於怪奇可駭處諷誦可笑處細心領會可駭處如詠落葉則曰謂是夜氣滅望舒實其圓詠作文則曰蛟龍弄角牙造次欲手攬可笑處如詠登科則曰傍輩妬且熱喘如竹筒吹詠苦寒則曰羲和送日出惟怯頻窺覘爾從此等處用心可以長才力亦可添風趣

余久不作詩而好讀詩每夜輒取古人名篇高聲朗誦用以自

娛所選抄五古九家七古六家聲調皆極鏗鏘耐久百讀不厭
余所未抄者如左太冲江文通陳子昂柳子厚之五古鮑明遠
高達夫王摩詰陸放翁之七古聲調亦清越異常爾欲作五古
七古須熟讀五古七古各數十篇先之以高聲朗誦以昌其氣
繼之以密詠恬吟以玩其味二者並進使古人之聲調拂拂然
若與我之喉舌相習則下筆爲詩時必有句調湊赴腕下詩成
自讀之亦自覺琅琅可誦引出一種興會來古人云新詩改罷
自長吟又云煨詩未就且長吟可見古人慘淡經營之時亦純
在聲調上下工夫蓋有字句之詩人籟也無字句之詩天籟也
解此者能使天籟人籟湊拍而成則於詩之道思過半矣

先讀李義山詩於情韻既有所得則將來於六朝人詩文亦必易於契合凡大家名家之作必有一種面貌一種神態與他人迥不相同譬之書家羲獻歐虞褚李顏柳一點一畫其面貌既截然不同矣神氣亦全無似處

本朝張得天何義門雖稱書家而未能盡變古人之貌故必如劉石庵之貌異神異乃可推爲大家詩文亦然若非其貌其神迥絕羣倫不足以當大家之目渠旣迥絕羣倫矣而後人讀之不能辨識其貌領取其神是讀者之見解未到非作者之咎也以後讀古文古詩惟當先誌其貌後觀其神久之自能分別蹊徑今人動指某人學某家大氏多道聽塗說扣槃捫燭之類不

足信也君子貴於自知不必隨眾口爲附和耳

凡詩文趣味約有二種一日談詭之趣一日閑適之趣談詭之趣惟莊柳之文蘇黃之詩韓公詩文皆極談詭此外實不多見閑適之趣文惟柳子厚遊記近之詩則韋孟白傅均極閑適而余所好者尤在陶之五古杜之五律陸之七絕以爲人生具此高淡襟懷雖南面王不以易其樂也

無論古今何等文人其下筆造句總以珠圓玉潤爲主無論古今何等書家其落筆結體亦以珠圓玉潤四字爲主故吾前示爾書專以一重字救爾之短一圓字望爾之成也世人論文家之語圓而藻麗者莫如徐庾而不知江鮑則更圓進之沈任則

亦圓進之潘陸則亦圓又進而掬之東漢之班張崔蔡則亦圓又進而溯之西漢之賈鼂匡劉則亦圓至於馬遷相如子雲三人可謂力趨險奧不求圓適矣而細讀之亦未始不圓至於昌黎其志意直欲陵駕子長卿雲三人戛戛獨造力避圓熟矣而久讀之實無一字不圓無一句不圓爾等於古人之文若能從江鮑徐庾四人之圓步步上溯直窺卿雲馬韓四人之圓則無不可讀之古文矣卽無不可通之經史矣

爾問文中雄奇之道雄奇以行氣爲上造句次之選字又次之然未有字不古雅而句能古雅句不古雅而氣能古雅者亦未有字不雄奇而句能雄奇句不雄奇而氣能雄奇者是文章之

雄奇其精處在行氣其粗處全在造句選字也余好古人雄奇之文以昌黎爲第一揚子雲次之二公之行氣本之天授至於人事之精能昌黎則造句之工夫居多子雲則選字之工夫居多爾問敘事誌傳之文難於行氣是殊不然如昌黎曹成王碑韓許公碑固屬千奇萬變不可方物卽盧夫人之銘女挈之誌寥寥短篇亦復雄奇崛強爾試將此四篇熟看則知二大二小各極其妙矣爾所作雪賦辭意欠古雅且氣勢不鬯對仗不工兩漢不尙對仗潘陸則對矣江鮑庾徐則工對矣亦宜從對仗上用工夫

讀書之法看讀寫作四者每日不可缺一看者如去年看史記

漢書韓文近思錄今年看周易折衷之類是也讀者如四書詩書易經左傳諸經昭明文選李杜韓蘇之詩韓歐曾王之文非高聲朗誦則不能得雄偉之概非密詠恬吟則不能探其深遠之韻譬之富家居積看書則在外貿易獲利三倍者也讀書則在家慎守不輕花費者也譬之兵家戰爭看書則攻城略地開拓土宇者也讀書則深溝堅壘得地能守者也看書與子夏之日知所亡相近讀書與無忘所能相近二者不可偏廢至於寫字切不可間斷一日既要求好又要求快余生平因作字遲鈍吃虧不少爾輩須力求敏捷每日能作楷書一萬則幾矣至於作諸文亦宜在二三十歲立定規模過三十後則長進極難作

四書文作試帖詩作律賦作古今體詩作古文作駢體文數者不可不一一講求一一試爲之少年不可怕醜須有狂者進取之趣過時不試爲之後此彌不肯爲矣

人生惟有常是第一美德余早年於作字一道亦嘗苦思力索終無所成近日朝朝摹寫久不間斷遂覺月異而歲不同可見年無分老少事無分難易但行之有恆自如種樹畜養日見其大而不覺耳紀澤短處在言語欠鈍訥舉止欠端重看書不能深入而作文不能崢嶸若能從此三事上下一番苦工進之以猛持之以恆不過一二年自爾精進而不覺言語遲鈍舉止端重則德進矣作文有崢嶸雄快之氣則業進矣

鄉間苦於無書然爾等生今日吾家之書業已百倍於道光中
年矣買書不可不多而看書不可不知所擇以韓退之爲千古
大儒而自述其所服膺之書不過數種曰易曰書曰詩曰春秋
左傳曰莊子曰離騷曰史記曰相如子雲柳子厚自述其所得
正者曰易曰書曰詩曰禮曰春秋旁者曰穀梁曰孟荀曰莊老
曰國語曰離騷曰史記二公所讀之書亦不甚多

學問之途自漢至唐風氣略同自宋至明風氣略同

國朝又自成一種風氣其尤著者不過顧閻

百戴東江黃錢辛

秦

味段懋

王祖懷

數人而風會所扇羣彥雲興爾若有志讀書不

必別標漢學之名目而不可不一窺數君子之門徑

余於

本朝大儒自顧亭林之外最好高郵王氏之學王安國以鼎甲官至尙書諡文肅正色立朝生懷祖先生念孫經學精卓生王引之復以鼎甲官尙書諡文簡三代皆好學深思有漢韋氏唐顏氏之風余自憾學問無成有愧王文肅公遠甚而望爾輩爲懷祖先生爲伯申氏則夢寐之際未嘗須臾忘也

本朝善讀古書者余最好高郵王氏父子今觀懷祖先生讀書雜誌中所考訂之書曰逸周書曰戰國策曰史記曰漢書曰管子曰晏子曰墨子曰荀子曰淮南子曰後漢書曰老莊曰呂氏春秋曰韓非子曰楊子曰楚辭曰文選凡十六種又別著廣雅

疏證一種伯申先生經義述聞中所考訂之書曰易曰書曰詩
曰周官曰儀禮曰大戴禮曰禮記曰左傳曰國語曰公羊曰穀
梁曰爾雅凡十二種王氏父子之博古今所罕然亦不滿三十
種也余於四書五經之外最好史記漢書莊子韓文四種好之
十餘年惜不能熟讀精考又好通鑑文選及姚惜抱所選古文
辭類纂余所選十八家詩鈔四種共不過十餘種早歲篤志爲
學恆思將此十餘種書貫串精通略作劄記仿顧亭林王懷祖
之法今年齒衰老時事日艱所志不克成就中夜思之每用愧
悔

國朝如王西莊孫淵如江艮庭皆注尙書顧亭林惠定宇王伯

申皆注左傳皆刻

皇清經解中書經則孫注較勝王江不甚足取左傳則顧惠王三家俱精王亦有書經述聞大抵十三經注疏以三禮爲最善詩疏次之此外皆有醕有駁書經注疏頗庸陋不如詩經之該博我

朝儒者如閻百詩姚姬傳諸公皆辨別古文尙書之僞孔安國之傳亦僞作也蓋秦燔書後漢代伏生所傳歐陽及大小夏侯所習皆僅二十八篇所謂今文尙書者也厥後孔安國家有古文尙書多十餘篇遭巫蠱之事未得立於學官不傳於世厥後張霸有尙書百兩篇亦不傳於世後漢賈逵馬鄭作古文尙書

注解亦不傳於世至東晉梅賾始獻古文尚書并孔安國傳自
六朝唐宋以來承之卽今通行之本也自吳才老及朱子梅鼎
祚歸震川皆疑其爲僞至閻百詩遂專著一書以痛辨之名曰
疏證自是辨之者數十家人人皆稱僞古文僞孔氏也日知錄
中略著其原委王西莊孫淵如江艮庭三家皆詳言之此亦六
經中一大案不可不知也

漢唐人注疏其惡處在確守故訓失之穿鑿其好處在確守故
訓不參私臆釋謂爲勤尙不數見釋言爲我處處皆然蓋亦十
口相傳之語而不復欲文氣之不安如伐木爲文王與友入山
驚鵲爲明王交於萬物與螽斯章解同一穿鑿朱子集傳一掃

舊障專在涵泳神味虛而與之委蛇然如鄭風諸什注疏以爲
皆刺忽者固非朱子以爲皆淫奔者亦未必是凡治經之時無
論看注疏看朱傳總宜虚心求之其愜意者則以硃筆識出其
懷疑者則以另冊寫一小條或多爲辨論或僅着數字將來疑
者漸漸又記於此條之下久之漸成卷帙則自然日進汝讀四
書無甚心得由不能虚心涵泳切已體察朱子教人讀書之法
此二語最爲精當爾現讀離婁卽如離婁首章上無道揆下無
法守吾往年讀之亦無甚警惕近歲在外辦事乃知上之人必
揆諸道下之人必守乎法若人人以道揆自許從心而不從法
則下凌上矣愛人不親章往年讀之不甚親切近歲閱歷日久

乃知治人不治者智不足也此切已體察之一端也涵泳二字最不易識余嘗以意測之曰涵者如春雨之潤花如清渠之溉稻雨之潤花過小則難透過大則離披適中則涵濡而滋液清渠之溉稻過少則枯槁過多則傷滂適中則涵養而淳興泳者如魚之游水如人之濯足程子謂魚躍於淵活潑潑地莊子言濠梁觀魚安知非樂此魚水之快也左太冲有濯足萬里流之句蘇子瞻有夜卧濯足詩有浴罷詩亦人性愛水者之一快也善讀書者須視書如水而視此心如花如稻如魚如濯足則涵泳二字庶可得之於意言之表爾讀書易於解說文字卻不能甚深入可就朱子涵泳體察二語悉心求之

聞兒經書將次讀畢差用少慰自五經外周禮儀禮爾雅孝經公羊穀梁六書自古列之於經所謂十三經也此六經宜請塾師口授一編不必求熟十三經外所最宜熟讀者莫如史記漢書莊子韓文四種余生平好此四書嗜之成癖憾未能一一誥釋箋疏窮力討治自此四種而外又如文選通典說文孫武子方輿紀要近人姚姬傳所輯古文辭類纂余所鈔十八家詩此七書者亦余嗜好之次也凡十一種余以配之五經四書之後而周禮等六經者或反不知篤好蓋未嘗致力於其間而人之性情各有所近焉爾吾兒既讀五經四書卽當將十一書尋究一番縱不能講習貫通亦當思涉獵其大略則見解日開矣

小學凡三宗言字形者以說文爲宗古書凡大小徐二本至我朝而段氏特開生面而錢坫王筠桂馥之作亦可參觀言訓詁者以爾雅爲宗古書惟郭注邢疏至

本朝而邵二雲之爾雅正義王懷祖之廣雅疏證郝蘭皋之爾雅義疏皆稱不朽之作言音韻者以唐韻爲宗古書惟廣韻集韻至

本朝而顧氏音學五書乃爲不刊之典而江慎修戴原段茂王懷祖

孔軒江三晉諸作亦可參觀故欲學爲小學鑽研古義則三宗如

顧江段邵郝王六家之書均不可不涉獵而探討之

爾問種種二字此字段茂堂辨論甚晰種爲執也猶吾鄉言栽也點也插也

種爲後熟之禾詩之黍稷重稷說文作種種種正字也重段借字也稷與種異同字也隸書以種種二字互易今人於耕種概用種字矣吾於訓詁辭章二端頗嘗盡心爾看書若能通訓詁則於古人之故訓大義引申段借漸漸開悟而後人承譌襲誤之習可改若能通辭章則於古人之文格文氣開合轉折漸漸開悟而後人硬腔滑調之習可改是余之所厚望也

說文中尚有逸字今將貴州鄭子尹所著二卷寄爾一閱渠所補一百六十五文皆許書本有之字而後世脫失者也其子知同又附攷三百字則許書本無之字而他書引說文有之知同辨爲不當有者也爾將鄭氏父子書細閱一徧則知叔重原有

之字被傳寫逸脫者實已不少

欲讀周漢古書非明於小學無可問津余於道光末年始好高郵王氏父子之說從事戎行未能卒業用以爲愧耳

余生平有三恥學問各塗皆略涉其涯涘獨天文算學豪無所知雖恆星五緯亦不識認一恥也每作一事治一業輒有始無終二恥也少時作字不能臨摹一家之體遂致屢變而無所成遲鈍而不適於用近歲在軍因作字太鈍廢閣殊多三恥也爾輩當思雪此三恥推步算學縱難通曉恆星五緯觀認尙易家中言天文之書有十七史中各天文志及五禮通考中觀象授時一種每夜認明恆星二三座不過數月可畢識矣

國朝大儒於天文歷算之學講求精熟度越前古自梅定九王寅旭以至江戴諸老皆稱絕學然皆不講占驗但講推步占驗者觀星象雲氣以卜吉凶史記天官書漢書天文志是也推步者測七政行度以定授時史記律書漢書律歷志是也秦味經先生之觀象授時簡而得要能略窺二者之端緒則足以補余之闕憾矣

諭子紀澤

爾作時文宜先講辭藻欲求辭藻富麗不可不分類抄撮體面話頭近世文人如袁簡齋趙甌北吳穀人皆有手抄詞藻小本此眾人所共知者阮文達公爲學政時搜出生童夾帶必自加

細閱如係親手所抄略有條理者卽予入學如係倩人所抄概錄陳文者照例罪斥阮公一代閩儒則知文人不可無手抄夾帶小本矣昌黎之記事提要纂言鈎元亦係分類手抄小冊也爾此時下手工夫以分類手抄辭藻爲第一義爾此次覆信卽將所分之類開列目錄附稟寄來分大綱子目如倫紀類爲大綱則君臣父子兄弟爲子目王道類爲大綱則井田學校爲子目此外各門可以類推如江慎修之典林及子史精華淵鑑類函則可鈔者尤多矣爾試爲之此科名之要道亦卽學問之捷徑也

目錄分類非一言可盡大氏有一種學問卽有一種分類之法

有一人嗜好卽有一人摘抄之法若從本原論之當以爾雅爲分類之最古者天之星辰地之山川鳥獸草木皆古聖賢人辨其品彙命之以名書所稱大禹主名山川禮所稱黃帝正名百物是也必先有名而後有是字故必知命名之原乃知文字之原舟車弓矢俎豆鐘鼓日用之具皆先王制器以利民用必先有器而後有是字故又必知制器之原乃知文字之原君臣上下禮樂兵刑賞罪之法皆先王立事以經綸天下或先有事而後有字或先有事而後有字故又必知萬事之本而後知文字之原此三者物最初器次之事又次之三者既具而後有文辭爾雅一書如釋天釋地釋山釋水釋草木釋鳥獸蟲魚物之屬

也釋器釋宮釋樂器之屬也釋親事之屬也釋詁釋訓釋言文辭之屬也爾雅之分類惟屬事者最略後世之分類惟屬事者最詳事之中又判爲兩端焉曰虛事曰實事虛事如經之三禮馬之八書班之十志及三通之區別門類是也實事就史鑑中已往之事蹟分彙纂記如事文類聚孔白六帖太平御覽及我朝淵鑑類函子史精華等書是也爾所呈之目錄亦是抄摘實事之象而不如子史精華中目錄之精當爾可取子史精華核對將子目略爲減少後世人事日多史冊日繁摘類書者事多而器物少乃勢所必然耳即可照此抄去但期與子史精華規模相仿卽爲善本其末附古語鄙諺雖未必無用而不如徑摘

抄說文訓詁庶與爾雅首三篇相近也余亦仿爾雅之例抄纂類書以記日知月無忘之效特患年齒已衰軍務少暇終不能有所成耳

作字須講究墨色古來書家無不善使墨者能令一種神光活色浮於紙上固由臨池之勤染翰之多所致亦緣於墨之新舊濃淡用墨之輕重疾徐皆有精意運乎其間故能使光氣常新也

凡作一事無論大小難易皆宜有始有終作字時先求圓勻次求敏捷若一日能作楷書一萬少或七八千愈多愈熟則手腕豪不費力將來以之爲學則手抄羣書以之從政則案無留牘

無窮受用皆自寫字之勻而且捷生出三者皆足彌吾之缺憾矣

爾近來寫字總失之薄弱骨力不堅勁墨氣不豐腴與爾身體向來輕字之弊正是一路毛病爾當用油紙摹顏字之郭家廟柳字之琅琊碑元秘塔以藥其病日日留心專從厚重二字上用功否則字質太薄卽體質亦因之更輕矣

古人解經有內傳有外傳內傳者本義也外傳者旁推曲衍以盡其餘義也孔子繫易小象則本義爲多大象則餘義爲多孟子說詩亦本子貢之因貧富而悟切磋子夏之因素絢而悟禮後亦證餘義處爲多韓詩外傳盡餘義也左傳說經亦以餘義

立言者多

高郵王懷祖先生父子經學爲 本朝之冠皆自劄記得來故鈎元提要爲讀書第一要訣

爾稟氣太清清則易柔惟志趣高堅則可變柔爲剛清則易刻惟襟懷闊遠則可化刻爲厚余字爾曰劄剛恐其稍涉柔弱也教爾讀書須具大量看陸詩以導閒適之抱恐其稍涉刻薄也爾從此二字用功則終身受用不盡矣

家中因溫甫叔之變氣象較之往年迥不相同余因去年在家爭辨細事與鄉里鄙人無異至今深抱悔恨故雖在外亦惻然寡歡惟爾當體我此意於叔祖各叔父母前盡些愛敬之心常

存休戚一體之念無懷彼此歧視之見則老輩內外必器愛爾後輩兄弟姊妹必以爾爲榜樣日處日親愈久愈敬若使宗族鄉黨皆曰紀澤之量大則余欣然矣

今年春夏爾在家中比余更忙然古今文人學人莫不有家常瑣事之勞其身莫不有世態冷暖之撓其心爾現當家門鼎盛之時炎涼之狀不接於目衣食之謀不繁於懷雖奔走煩勞猶遠勝於寒士困苦之境也

新婦能得爾母之歡卽是家庭之福我

朝

列聖相承總是寅正卽起至今三百年不改我家高曾祖考相

傳早起吾得見竟希公星岡公皆未明卽起冬寒起坐約一个
時辰始見天亮吾父竹亭公亦甫黎明卽起有事則不待黎明
每夜必起看一二次不等此爾所及見者也余近因黎明卽起
思有以紹先人之家風爾旣冠授室當以早起爲第一先務自
力行之亦率新婦力行之余生平坐無恆之弊萬事無成德無
成業無成已可深恥矣逮辦理軍事自矢靡他中間本志變化
尤無恆之大者用爲內恥爾欲稍有成就須從有恆二字下手
余嘗細觀星岡公儀表絕人全在一重字余行坐容止亦頗重
厚蓋取法於星岡公爾之容止甚輕是一大弊病以後宜時時
留心無論行坐均須重厚早起也有恆也重也三者皆爾最要

之務早起是先人之家法無恆是吾身之大恥不重是爾身之短處故特誼誼戒之

聞三孫女乾秀殤亡殊爲感惱知爾夫婦尤傷懷也然吾觀兒女多少成否絲毫皆有前定絕非人力所可強求故君子之道以知命爲第一要務不知命無以爲君子也爾於兒女一事不免沾滯之象吾觀鄉里貧家兒女愈看得賤愈易長大富戶兒女愈看得嬌愈難成器爾夫婦視兒女過於嬌貴柳子厚郭橐駝傳所謂旦視而暮撫爪膚而搖本者愛之而反以害之彼謂養樹通於養民吾謂養樹通於養兒爾與彘婦宜深曉此意莊子每說委心任運聽其自然之道令人讀之首肯思之發嘆東

坡有目疾不肯醫治引莊子曰聞在宥天下不聞治天下也
爾爲下輩之長須常常存个樂育諸弟之念君子之道莫大乎
與人爲善况兄弟乎

余嘗謂官名太盛必多缺憾我實近之聰明太露必鮮福澤爾
頗近之順境太多必生波災爾母近之余每以此三者爲慮計
惟力行孝友多吃辛苦少享清福庶幾挽迴萬一

老年來始知聖人教孟武伯問孝一節之真切爾雖體弱多病
然只宜清靜調養不宜妄施政治莊生云聞在宥天下不聞治
天下也東坡取此二語以爲養生之法爾此番在家試取在宥
二字之話訓體味一番則知莊蘇皆有順其自然之意養生亦

然治天下亦然若服藥而日更數方無故而終年峻補症輕而妄施攻伐強發求汗則如商君治秦荆公治宋全失自然之妙柳子厚所謂名爲愛之其實害之陸希聲所謂天下本無事庸人自擾之皆此義也東坡遊羅浮詩云小兒少年有奇志中宵起坐存黃庭下一存字正合莊子在宥二字之意蓋蘇氏兄弟父子皆講養生竊取黃老微旨故稱其子爲有奇志爾宜窺透此旨余教爾從眠食二端用功看似粗淺却得自然之妙爾以後不輕服藥自然日就壯健矣

人之氣質由於天生本難改變惟讀書則可變化氣質古之精相法者並言讀書可以變換骨相欲求變之之法總須先立堅

卷二十一
三
卓之志卽以余生平言之三十歲前最好吃煙片刻不離至道光壬寅十一月廿一日立志戒煙至今不再吃四十六歲以前作事無恆近五年深以爲戒現在大小事均尙有恆卽此二端可見無事不可變也爾於厚重二字須立志變改古稱金丹換骨余謂立志卽丹也

余作字不成體段生平欲將柳誠懸趙子昂兩家合爲一鑪亦爲間架欠工夫有志莫遂爾以後當從間架用一番苦功每日用油紙摹帖二百字或三百字不過數月間架與古人逼肖而不自覺能合柳趙爲一此吾之素願也不能則隨爾自擇一家但不可見異思遷耳

諭子紀鴻

家中人來營者多稱爾舉止大方余爲少慰凡人多望子孫爲大官余不願其爲大官但願讀書爲明理之君子勤儉自持習勞習苦可以處樂可以處約此君子也余服官二十年不敢稍染宦宦氣習飲食起居尙守寒素家風極儉也可略豐也可太豐則吾不敢也凡仕宦之家由儉入奢易由奢返儉難爾年尙幼切不可貪愛奢華不可慣習懶惰無論大家小家士農工商勤苦儉約未有不興驕奢倦怠未有不敗爾讀書寫字不可間斷早晨須早起莫墜高曾祖考以來相傳之家風吾父吾叔皆黎明卽起爾之所知也凡富貴功名皆有命定半由人力半由

天事惟學作聖賢全由自己作主不與天命相干涉吾有志學爲聖賢少時欠居敬工夫至今猶不免偶有戲言戲動爾舉止端莊言不妄發則入德之基也

爾等總以習勞苦爲第一要義生當亂世居家之道不可有餘財多財則終爲患害又不可過於安逸偷情如由新宅至老宅必宜常常走路不可坐轎騎馬又常常登山亦可以練習筋骸也余不蓄積銀錢使子弟自覺一無可恃一日不勤則將有饑寒之患則爾等漸漸勤勞知謀所以自立

前聞爾縣試幸列首選爲之欣慰所寄各場文章亦皆清潤大方昨接易芝生先生信知爾已到省城繁華之地爾宜在寓中

靜坐不可出外遊戲徵逐茲余留商郭意城先生於東征局兌銀四百兩交爾在省作進學之用印卷之費向例兩學及學書共三分爾每分宜送錢百千鄧寅師處送謝禮銀百兩鄧十世兄處送銀十兩助渠買書之資餘銀數十兩爲爾零用及略添衣物之需凡世家子孫衣食起居無一不與寒士相同庶可以成大器若沾染富貴氣習則難望有成吾忝爲將相而所有衣服不值三百金願爾等常守此儉樸之風亦惜福之道也其照例應用之錢不宜過奢

鴻兒文筆勁健可慰可喜此次連珠文先生改者若干字擬體係何人主意再詳稟告我銀錢田產最易長驕氣逸氣我家中

斷不可積錢斷不可買田爾兄弟努力讀書決不怕沒飯吃
爾寫信太短近日所看之書及領略古人文字意趣儘可自據
所見隨時質正凡文字有氣則有勢有識則有度有情則有韻
有趣則有味古人絕好文字大約如此四者之中必有一長爾
所聞古文何篇於何者爲近可放論而詳問焉

余教爾用油紙摹帖爾偏不肯摹何其堅信眉生之言而輕疑
父之言耶眉生又言學顏柳要寫得蠢余亦不以爲然余所謂
困乃求秀而不得秀求快而不得快非欲其蠢也凡作字總要
寫得秀學顏柳學其秀而能雄學趙董恐其秀而失之弱耳爾
並非下等姿質特從前無善講善誘之師近來又頗有好高好

速之弊若求長進須勿忘而兼以勿助乃不致走入荆棘耳

求闕齋弟子記

卷二十六

三

求闕齋弟子記卷二十六

求闕齋弟子記卷二十七

東湖王定安纂

吏治一

官常

人非聖賢難於求備短長互見乃士之常在朝廷之用才貴節
取其所長而糾察其所短在臣子之自飭貴勉其所已知而增
其所不能

經濟以歷練而成人才以獎借而出苟有所聞卽當蒐羅薦達
造就爲他日之用

禍福成敗多涉計較則危急之時難期堅定功名之地難泯矜

爭

凡位偏則相忌勢均則相疑督撫同城自昔鮮能和協而善終爲撫者當任勞而不炫己之能爲督者亦當讓善而曲盡人之長庶幾相與有成

督撫權重由來已久黜陟司道榮辱終身風旨所在能使人先事而逢迎既事而隱飾不特司道不肯違其情卽軍民亦不敢忤其意

行政之要首在得人吏治之興廢全繫乎州縣之賢否安徽用兵十載蹂躪不堪人人視爲畏途通省實缺人員僅有知府二人州縣二人卽候補者亦屬寥寥每出一缺遴選乏員小民久

困水火之中偶得一良有司斟酌而照嫗之無不感深挾纘事
半功倍然使拘泥舊章繩以格例不稍示變通之法則目前幾
無可委之員不廣開登進之途則將來難收得人之效湖北自
三次克復後地方凋敝與今日之安慶相同前任撫臣胡林翼
羅致賢才多方培養不數年間吏治漸振撫字催科綽有條理
咸豐九年胡林翼奏補府州縣各缺大半與例不符均經通融
議准在案此後安徽卽比照湖北章程辦理聞有才品稍優譽
望漸著者隨時札調來營試用如其有裨吏治專案奏請錄用
苟非實有過人之才不敢率爲破格之請縱或稍出定例之外
亦不悖乎立法之原

近日疆吏於得力幹員附入戰功通融入奏久爲軍營積習各省皆然蓋統領營官之文案皆得保獎而督撫之文案獨令向隅情勢有所難行其中固有冒功倖進亦有愛惜人才借此以振拔淹滯者顧督撫之心公私何如所保之人邪正何如耳直隸履任以後密札藩臬兩司令將府廳州縣各員開列優者一單劣者一單面呈商辦月餘以來接見羣僚賢員亦尙不少差喜所見勝於所聞但令彰聞之無私可冀風氣之漸轉直隸之弊大約積獄太多羈累無辜聞有州縣到任年餘未曾坐堂一次訊結一案者又因連年川兵差徭甚重大戶則勒派車馬供支柴草小戶則攤派錢文掇充長夫劣紳勾通書役因

緣訛索車輛有出而無歸貧戶十室而九逃今雖軍事大定尙復派修城之費索前欠之費誅求無已大吏過於寬厚罔恤民艱加以政出多門相忍爲國劣員於此處敗露方懼嚴參而被處鑽營反得優保總督之事權不一屬僚之徑竇愈多玩上則欺弄是非虐民則毫無忌憚風氣之壞竟爲各省所未聞不得不大加參劾擬以清理積訟停止雜派爲先務嚴立法禁違者重懲自問素非苛刻者流近在江南亦係失之於寬今忽變爲嚴厲劣員或求書函以圖救全或騰謗議以冀寬弛皆屬意中之事當隨時體察攻伐之劑去病卽止苟使數月期年風氣稍轉亦無難漸就和平復我常度而下車伊始則非剛猛不能除

此官邪

古來循良之吏或有璽書褒美非必歲歲遷官人人進秩也近世各省保舉浮濫習見不珍故有雖無獎拔之實而循聲達於聖聰卽光寵愈於華袞若是者應請無庸調取引見俾得久於其位專心民事

大抵人才隨風氣爲轉移自到直隸半年不能多方訓迪使僚屬感發興起欲求政績卓著超越等倫者殊難多覩就其操履不苟勤敬自持者列入刻章庶幾獎勸所加精神一振觀摩惕勵卽可漸躋循良之域

直隸履任月餘見日行公事訟案居十之七八他件不過十之

二三頻年辦理軍務積壓極多督署應題之本未辦者二百三十餘件府局京控上控之案未結者一百三十餘件各屬委審及自理之案未完者殆以萬計或延擱二三年或五六年八九年不等吏治之疲民生之困端由於此自誤清訟事宜十條令司道及局員等覆核又囑臬司張樹聲議限期功過章程十餘條其中最要者直隸舊章州縣積案若干件按月有四柱冊報監禁若干名管押若干名亦按月有四柱冊報未獲之賊瘐斃之囚按月亦有稟報立法本屬盡善無奈虛應故事遂無成效今特令各屬實力奉行督同臬司實力稽查每月將各屬報冊詳細核對分別功過懸榜院司官廳且催且誠以冀日起有功

以上奏議

用法從嚴非漫無條律一師屠伯之爲要以精微之意行吾威屬之事期於死者無怨生者知警而後寸心乃安

余在長沙日事訟獄不法痞匪輒予磔死以是得猛厲之名實亦誅戮無幾少見多怪俗人自生詫耳

保甲之法誠爲善政然判定科條散布鄉愚求能行法之人不苛歛於民間蓋或百里而不得一賢焉世教旣衰人人各逞其亡等之欲魚肉孱民而刀匕之官司布一令甲徒以供若輩橫索暴歛之名目故團練保甲皆今日之要務而鄙人妄謂皆不可鹵莽以行滅裂以舉

人心陷溺固久獨嚴縛匪黨動與磔死差令鄉里善良得以伸彼之氣而應吾之令耳

吾輩所慎之又慎者只在用人二字此外竟無可着力之處古人云吾輩若從流俗毀譽上討消息必至站腳不牢余平日短處亦只在毀譽上討消息近則思在用人當否上討消息耳人存而後政舉方今四方多難綱紀紊亂將欲維持成法似仍須引用正人隨事納之準繩庶不泥於例而又不悖於理

有仁心有遠識大本立矣所患者在不善擇不善棄耳如有兩事宜行一急一緩則當擇其急者棄其緩者若兩事并急則當擇其尤急者棄其次急者如有兩人宜用一優一劣則當擇其

優者棄其劣者若兩人並優則當擇其尤優者棄其次優者推之行文之命意用兵之爭鬪有所擇不能不有所棄若不善於棄欲諸政并舉則恐一事難成

爲政下手之處宜專而不宜博譬之食前方丈下箸必先一肴錦衣百箱著體不過數襲故善棄之說爲最要

州縣略好一分百姓略安一分卽吾輩清夜自思可自慰一分詠芝功在天下以吏治大改面目並變風氣爲第一蕩平疆土千里猶爲次着

軍興太久地方糜爛鄙意一面治軍勦賊一面擇吏安民二者斷不可偏重擇吏之道亦不外乎有操守而無官氣多條理而

少大言二語

知稼穡知情僞不剝取官財民財察吏之論當奉此爲圭臬頃致李小泉書亦取人貴有操守而無官氣多條理而少大言若能引出一班正人倡成一時風氣則區區所藉以報國者也吾嘗謂人才隨風氣爲移轉文武興則民好善幽厲興則民好暴兩次指斥之人似亦不能一一懲究擇其劣蹟尤著者嚴劾一二以儆其餘宜細心察訪無漏吞舟而誅及蝦蟇也季高謂用法不如用人用人當先得其心而後得其力精理名言至當不易

時事極艱凡好官雖有案亦當曲全若是劣員則不足顧惜

求人之道須如白圭之治生如鷹隼之擊物不得稍休又如蚊之有母雉之有媒以類相求以氣相引庶幾得一而可及其餘大抵人才約有兩種一種官氣較多一種鄉氣較多官氣多者好講資格好問樣子辦事無驚世駭俗之象語言無此防彼碍之弊其失也奄奄無氣凡遇一事但憑書辦家人之口說出憑文書寫出不能身到心到口到眼到尤不能苦下身段去事上體察一番鄉氣多者好逞才能好出新樣行事則知己不知人語言則顧前不顧後其失也一事未成物議先騰兩者之失厥咎維均人非大賢亦斷難出此兩失之外吾欲以勞苦忍辱四字教人故且戒官氣而姑用鄉氣之人必取遇事體察身到心

到口到眼到者趙廣漢好用新進少年劉晏好用士人理財竊願師之

大抵人才約有兩種高明者好顧體面恥居人後獎之以忠則勉而爲忠許之爲廉則勉而爲廉卽薪水稍優誇許稍過冀有人材出乎其間不妨略示假借卑瑣者本無遠志但計錙銖馭之以嚴則生憚防之稍寬則日肆務使循循於規矩之中方好州縣以上類多自愛佐雜以下類多算細以釐務論大卡總局必求自愛之士小卡分局不乏算細之員

國家定例督撫以司詳爲憑司道以縣稟爲憑州縣以紳民公呈爲憑論者謂如漢學考據之家惟恐其說之不出於人余則

素性武斷擬仿理學陸王之家惟恐其說之不出於己

國初凡奏牘無不由驛者雍正間始有摺匣專差奏事與由驛並行不悖乾隆以來亦不以專差爲是發驛爲非也道光末始有常件不應發報之說其實並非故常今則習爲常例吾輩亦宜循而行之不必立異

文官加養廉始於雍正三年之耗羨歸公武官加養廉始於乾隆四十六年之補缺額名糧

皖南四府一州實大有爲之地只要軍事吏事兩者切實講求每年可得銀百三四十萬若東壩克復則尙不止於此惟須得極廉極勤之州縣一二人來此樹之風聲與民更始庶幾漸有

轉機

皖南實大有爲之地將來必有可觀但須有一二循吏方好細觀今日局勢若不從吏治人心上痛下工夫滌腸蕩胸斷無挽回之理

廉卿欲從江西吏治人心着手可謂探驪得珠鄙人雖陋亦日夜不忘此義無如江河日下人物邈然求如湖北之吏治尙非旦夕可冀現惟親附同官飭屬屬僚一一皆手書勞勉庶期鑒此愚誠漸就範圍

六安產米之區近日百姓流亡田荒不畊關係極大愚意專欲招集流亡設法耕種若今年合州種稻則秋收後可以供湘軍

之食不須由湖北運米赴霍六一帶則所省多矣

在皖年餘吏治毫無起色可愧之至奏請新進士中簽分十六員來皖尙無至者大抵吏治與軍務相表裏皖省羣盜如毛人民相食或百里不見炊煙雖有龔黃良吏從何施乎

筠仙減蘇松浮糧變屯衛兵制二牘皆經世不刊之作不特提銷甲乙丙丁諸綱直恐卜綱三十卜銷八百其利永矣二事皆期於必成但糧減浮收則可卽奏卽辦減浮額則須待克復金陵蘇常後乃可會奏程正叔云是則是有此理賢却說得太早在

皖中文武各官於和煦熙熙之中均有恪恭祇肅之象亦足見

寬而有制之效

直隸公牘似較之江表微多規模於六部相近刑名案件極多
甲於各省余雖曾署刑部而於律例素未研究今乃如八十阿
婆初學作羹既食性之不諳且捩手而輒覆自媿亦自笑也

燕薊不乏名賢明世如楊趙鹿孫輩皆以豪俠而入聖哲之域
今則遺風邈然而淫亂滅倫之案層見叠出人才日少風俗日
薄所關匪淺前飭各屬保舉人材現亦次第來省自慙學業百
無一成不足以引導多士思欲得一德成而學富者爲多士之
楷模或作山長或別爲位置總求莊敬摯懇與士類旦夕切磋
士氣果振薄俗或藉以漸變雖明知收效迂遠然不敢竟置之

不講也

到任半年略無寸效抱愧何極精力久已衰頹近尤意興銳減
古人所謂不學便老而衰殆其驗矣

以上書牘

太史公所謂循吏者法立令行能識大體而已後世專尚慈惠
或以煦煦爲仁者當之失循吏之義矣因思爲將帥之道亦以
法立令行爲先整齊嚴肅爲重不貴煦嫗也

人才以陶冶而成不可眼孔太高動謂無人可用

居高位之道約有三端一曰不與謂於己毫無交涉也二曰不
終古人所謂日慎一日而恐其不終蓋居高履危而能善其終
鮮矣三曰不勝古人所謂懷乎若朽索之馭六馬栗栗危懼若

將隕於深淵蓋惟恐其不勝任也鼎折足覆公餗其形渥凶言不勝其任也方望溪言漢文帝爲君時時有謙讓若不克居之意其有得於不勝之義者乎孟子謂周公有不合者仰而思之夜以繼日其有得於惟恐不終之義者乎

求人約有四類求之之道約有三端治事約有四類治之之道約有三端求人之四類曰官也紳也綠營之兵也招募之勇也其求之之道三端曰訪察曰教化曰督責採訪如鷙鳥猛獸之求食如商賈之求財訪之旣得又須辨其賢否察其眞僞教者誨人以善而導之以其所不能也化者率之以躬而使其相從於不自知也督責者商鞅立木之法孫子斬美人之意所謂干

金在前猛虎在後也治事之四類曰兵事也餉事也吏事也交際之事也其治之道三端曰剖析曰簡要曰綜核剖析者如治骨角者之切如治玉石者之琢每一事來先須剖成兩片兩片剖成四片由四片而剖成八片愈剖愈懸絕愈剖愈細密如紀昌之視蠅如輪如庖丁之批卻導款總不使有一處之顛預一絲之含混簡要者事雖千端萬緒而其要處不過一二語可了如人身雖大而脈絡針穴不過數處萬卷雖多而提要鉤元不過數句凡御衆之道教下之法易則易知簡則易從稍繁難則人不信不從矣綜核者如爲學之道旣日知其所亡又須月無忘其所能每日所治之事至一月兩月又當綜核一次軍事吏

事則月有課歲有考餉事則平日有流水之數數月有總匯之帳總以後勝於前者爲進境此二者日日究心早作夜思其於爲督撫之道思過半矣

爲政之道得人治事二者並重得不外四事曰廣收慎用勤教嚴繩治事不外四端曰經分論合詳思約守操斯八術以往其無所失矣

爲治首務愛民愛民必先察吏察吏要在知人知人必慎聽言魏叔子以孟子所言仁術二字最有道理愛而知其惡惡而知其美卽術字之的解也

治世之道專以致賢愛民爲本其風氣之正與否則絲毫皆推

本於一己之身與心一舉一動一語一默皆化之以成風氣故
爲人上者專重修身以下之效者速而且廣也

三代以下不矯激不足以得美名不要結不足以得民心

蹈道則爲君子違之則爲小人觀人當究行事勘察不在虛聲
與言論當以精己識爲先採人言爲後

天下之大事宜考究者凡十四宗曰官制曰財用曰鹽政曰漕
務曰錢法曰冠禮曰婚禮曰喪禮曰祭禮曰兵制曰兵法曰刑
律曰地輿曰河渠皆以

本朝爲主而厯溯前代之沿革本末衷之於仁義師之以易簡
前世所襲誤者可以自我更之前世所未及者可以自我創之

其苟且者知將來之必敝其至當者知將來之必因所謂雖百世可知也

李次青赴徽州與之約法五章曰戒浮謂不用文人之好大言者曰戒過謙謂好爲逾恆之謙啓寵納侮也曰戒濫謂銀錢保舉宜有限制也曰戒反覆謂朝令夕改也曰戒私謂用人當爲官擇人不爲人擇官也

一省風氣係乎督撫司道及首府數人此外官紳皆隨風氣爲轉移者也

一料理官事摘出備查二圈點京報三注改摺紳此三者夜間之功課亦留心庶事之一端也

文淵閣書
卷二十一
三
抽釐之法勤以防偷漏和以安商旅

讀淮南子精神訓至大禹竭力以勞萬民句若有所感

皖省初定印委各務往往懸缺待人思所以造就之法每日接見州縣佐雜三人與之坐談而教誨之

余力戒州縣不苛取民財須令州縣有爲善之樂故必盡革攤捐之款使州縣曠然無累而後可與之更新

胡中丞言州縣辦上司衙門之差所費不過百千而其差總家丁開報至四千出之多縣令無所出則於錢糧不解積爲虧空皆天家受其弊故湖北州縣現無絲毫差事如有向例由州縣辦差者皆由藩庫發實銀與州縣令其發給不使州縣賠墊分

毫其名則天家吃虧其實則州縣無可藉口錢漕掃數清解爲
天家添出數十倍之利信爲知言

用紳士之法宜稍予以名利而仍不說破以養其廉恥

裁南河各官一案辦理甚爲斬截精細計裁去河督一缺河廳
十缺佐雜六十四缺武員七十六缺新添總兵一缺改二十四
營爲十營留舊操防兵二千七百餘人以修防改爲操兵五千
九百餘人每年省工程銀一百三四十萬兩省廉俸銀三萬餘
兩近來大政此事最有條理

以杜加稅

勸誠州縣四條

上而道府下而佐雜以此類推

一曰治署內以端本 宅門以內曰上房曰官親曰幕友曰家

丁頭門以內曰書辦日差役此六項者皆署內之人也爲官者欲治此六項人須先自治其身凡銀錢一分一毫一出入無不可對人言之處則身邊之人不敢妄取而上房官親幕友家丁四者皆治矣凡文書案牘無一不躬親檢點則承辦之人不舞弊而書辦差役二者皆治矣

二曰明刑法以清訟 管子荀子文中子之書皆以嚴刑爲是以赦宥爲非子產治鄭諸葛治蜀王猛治秦皆用嚴刑以致又安爲州縣者苟盡心於民事是非不得不剖辨讞結不得不迅速既求迅結不得不刑惡人以伸善人之氣非虐也除莠所以愛苗也懲惡所以安良也若一案到署不訊不結不分是非不

用刑法名爲寬和實糊塗耳懶惰耳縱姦惡以害善良耳

三曰重農事以厚生 軍興以來士與工商生計或未盡絕惟農夫則無一人不苦無一處不苦農夫受苦太久則必荒田不耕軍無糧則必擾民民無糧則必從賊賊無糧則必變流賊而大亂無了日矣故今日之州縣以重農爲第一要務病商之錢可取病農之錢不可取薄斂以紓其力減役以安其身無牛之家設法購買有水之田設法疏消要使農夫稍有生聚之樂庶不至逃徙一空

四曰崇儉樸以養廉 近日州縣廉俸入款皆無著落而出款乃未盡裁是以艱窘異常計惟有節用之一法尙可公私兩全

節用之道莫先於人少官親少則無需索酬應之繁幕友家丁少則減薪工雜支之費官廚少一雙之箸民間寬一分之力此外衣服飲食事事儉約聲色洋煙一一禁絕不獻上司不肥家產用之於己者有節則取之於民者有制矣

勸誡委員四條

向無額缺現有職事之員皆歸此類

一曰習勤勞以盡職 觀於田夫農父終歲勤勞而少疾病則知勞者所以養身也觀於舜禹周公終身憂勞而享壽考則知勞者所以養心也大抵勤則難朽逸則易壞凡物皆然勤之道有五一日身勤險遠之路身往驗之艱苦之境身親嘗之二曰眼勤遇一人必詳細察看接一文必反覆審閱三曰手勤易棄

之物隨手收拾易忘之事隨筆記載四曰口勤待同僚則互相規勸待下屬則再三訓導五曰心勤精誠所至金石亦開苦思所積鬼神亦通五者皆到無不盡之職矣

二曰崇儉約以養廉 昔年州縣佐雜在省當差并無薪水銀兩今則月支數十金而猶嫌其少昔年舉貢生員在外坐館不過每月數金今則增至一兩倍而猶嫌其少此所謂不知足也欲學廉介必先知足觀於各處難民徧地餓殍則吾輩之安居衣食已屬至幸尙何奢望哉尙敢暴殄哉不特當廉於取利并當廉於取名毋貪保舉毋好虛譽事事知足人人守約則氣運可挽回矣

三曰勤學問以廣才 今世萬事紛紜要之不外四端曰軍事
曰吏事曰餉事曰文事而已凡來此者於此四端之中各宜精
習一事習軍事則講究戰攻防守地勢賊情等件習吏事則講
究撫字催科聽訟勸農等件習餉事則講究丁漕釐捐開源節
流等件習文事則講究奏疏條教公牘書函等件講究之法不
外學問二字學於古則多看書籍學於今則多覓榜樣問於當
局則知其甘苦問於旁觀則知其效驗勤習不已才自廣而不
覺矣

四曰戒傲惰以正俗 余在軍日久不識術數占驗而頗能預
知敗徵大約將士有驕傲氣者必敗不獨將士然也凡委員有

傲氣者亦必憤事有情氣者亦必獲咎傲情之所起者微而積久遂成風俗一人自是將舉國子聖自雄矣一人髮起將舉國俾晝作夜矣今與諸君約多做實事少說大話有勞不避有功不矜人人如此存心則勛業自此出風俗自此正人材亦自此盛矣

勸誡紳士四條

本省鄉紳外省客游之士皆歸此類

一曰保愚儒以庇鄉 軍興以來各縣皆有紳局或籌辦團練或支應官軍大抵皆斂錢以集事或酌量捐資或按畝派費名為均勻分派實則高下參差在局之紳耆少出不在局之愚懦多出與局紳有聲氣者少出與局紳無瓜葛者多出與局紳有

夙怨者不惟勒派多出而且嚴催凌辱是亦未嘗不害民也欲選紳士以能保本鄉愚懦者爲上等能保愚懦雖僞職亦尙可恕凌虐愚懦雖巨紳亦屬可誅

二曰崇廉讓以奉公 凡有公局卽有經管銀錢之權又有勞績保舉之望同列之人或爭利權而相怨或爭保舉而相軋此不廉也始則求縣官之一札以爲榮繼則大柄下移毫無忌憚衙門食用之需仰給紳士之手擅作威福藐視官長此不遜也今特申戒各屬紳士以敬畏官長爲第一義財利之權歸之於官賞罰之柄操之自上卽同列衆紳亦互相推讓不爭權勢紳士能潔已而奉公則庶民皆尊君而親上矣

三曰禁大言以務實 以諸葛之智勇不能克魏之一城以范
韓之經綸不能制夏之一隅是知兵事之成敗利鈍皆天也非
人之所爲也近年書生侈口談兵動輒曰克城若干拓地若干
此大言也孔子曰攻其惡無攻人之惡近年書生多好攻人之
短輕詆古賢苛責時彥此亦大言也好談兵事者其閱歷必淺
好攻人短者其自修必疎今與諸君子約爲務實之學請自禁
大言始欲禁大言請自不輕論兵始自不道人短始

四曰擴才識以待用 天下無現成之人才亦無生知之卓識
大抵皆由勉強磨鍊而出耳淮南子曰功可強成名可強立董
子曰強勉學問則聞見博強勉行道則德日起中庸所謂人一

司馬文正公集卷之二十一
己百人十已千卽勉強工夫也今士人皆思見用於世而乏用世之具誠能考信於載籍問途於已經苦思以求其通躬行以試其效勉之又勉則識可漸進才亦漸充才識足以濟世何患世莫已知哉

以上各條分之則每一等人各守四條合之則凡諸色人皆可參觀聖賢之格言甚多難以備述朝廷之律例甚密亦難周知只此淺近之語科條在此黜陟亦在此願我同人共勉焉咸豐十一年九月曾國藩識

諭巡捕門印籤押

凡爲將帥者以不騷擾百姓爲第一義凡爲督撫者以不需索

屬員爲第一義督撫與屬員交涉以巡捕門印簽押三處爲最
明日起早經過地方卽是與州縣交涉之始茲特嚴定條約願
巡捕門印簽押敬聽而牢記之

第一不許凌辱州縣人無貴賤賢愚皆宜以禮貌相待凡簡慢
傲惰人施於己而不能堪者已施於人亦不堪也往嘗見督撫
過境其巡捕門印簽押及委員等見州縣官皆有倨侮之色嚴
厲之聲實可痛恨今當痛改惡習凡見州縣及文武屬員總以
和顏遜詞爲主不可稍涉傲慢致啟凌辱之漸

第二不許收受銀禮凡自愛者絲毫不肯苟取於人凡收入禮
物其初不過收茶葉小菜之類漸而收及鞍馬衣料漸而收及

金銀古玩其初不過投贈之情漸而笑索授意漸而誅求逼勒賄賂公行皆始於此嗣後我巡捕門印簽押務各自愛不准收受絲毫禮物卽茶葉小菜至親密友贈送微物若非稟明本部堂再三斟酌者概不准收倘有隱瞞收受者重則枷號梏責輕則遞解回籍

第三不許薦引私人凡巡捕門印簽押勢之所在人或不敢不從或其親族或其舊識或薦至各將營盤或薦入州縣衙門縱有過失互相隱蔽勾通袒護爲患甚大自此次告戒之後概不准薦人入將領之營入州縣之署亦不准各營各署收受

以上三條巡捕門印簽押三處各寫一分貼於座右如其自

度不能卽趁早告退若其在此當差卽小心凜遵本部堂旣告戒爾等亦加倍自行儆惕凡接見文武屬員無論大小雖至佐雜外委亦必以禮貌相待斷不以厲色惡聲加人至送禮物者一概謝絕不收無論茶葉小菜以及裁料衣服書籍字畫古玩器皿金銀食物均皆不收亦不薦人入武員之營文員之署此三者本部堂若犯其一准各隨員指摘諫爭立卽更改

金陵房產告示八條

爲曉諭事照得金陵房產章程前於去年七月議立七條復於十一月議立四條出示曉諭在案其中尙有不便於民者茲本

部堂復加體察將七月所定七條內刪去三條十一月所定四條內刪去一條酌改一條合行示諭爲此示仰居民人等一體遵照特示

一城內房產如原業主持有舊契准赴善後局呈明由局派員會同縣令往查與契符合注明驗訖字樣蓋用局印縣印准其管業如無印契實係業主取具鄰佑切結赴局呈明派員會同縣令確查給予單照蓋用局印縣印亦准執單管業

一城內房屋有現任大員權作衙署及辦公委員權作公局者卽有業主亦暫不准領還從呈明驗契蓋印之日起每月按照民價給予租錢俟另行修立衙署公局後再行給還業主

一偽府賊館有一所而佔數家地基者亦有原係一家而分爲數所者令各赴局呈明驗契委員會同首縣勘驗明白或各管原業或情願捨少就多割彼與此由民間自行議定呈明總局飭縣立案

一房屋未經焚毀尙屬完好者無論大屋小屋新造舊造一概不許拆毀有擅拆強毀者拏獲正法棹椅木器不許兵勇搬出城外如違重懲

一城廂內外空地如有客民願造房屋者先赴善後局呈明卽派保甲局委員履勘該地尙未有人認業者暫作官地視地之廣狹酌定租價刊刻雙聯執照載明丈尺若干地租若干照根

存善後局正照給客民收執准其蓋屋自此次出示之後如有未經呈明擅將無主空地起造新屋者除將房料充公外嚴行枷責若拆毀舊屋移造新屋者立正軍法其前此已造之屋亦限於年內呈明善後局勘地起租俟有原業主出來分別核辦至新年查出無照之屋亦將房料充公

一空地新造之屋如原地主歸來赴善後局呈明派保甲局委員確切查明即將善後局所議地租交原地主承管所造之屋或新屋主酌找地價或舊地主酌找屋價和商定議各聽自便其親族代認者呈明後准其立案不准領照自克復日起扣足兩年無人來認再行核辦

一舊存之屋無契據者若專以鄰佑爲憑又恐賄串互保弊竇叢生嗣後無契之人赴善後局呈明由保甲局委員詢問明確令其具結承領給予雙聯執照暫行管業兩年以內不准轉典轉售如承領之後另有眞業主出來呈明確據卽將在前具結冒領之人枷號兩月充軍四千里嚴懲冒認者所以保全眞業主也

一金陵克復一年之久原屋主尙多未歸而本籍客籍之人進屋寄居者正復不少此後如眞屋主歸來赴善後局呈明派保甲局委員赴屋履勘分別開導或租或讓自應商量辦理各存恕道毋啟訟端切屬切屬

直隸清訟事宜十條

第一條通省大小衙門公文宜速 凡公事遲延通弊有二曰
支曰展支者推諉他人如院仰司司仰府府仰縣之類一經轉
行卽算辦畢但求出門不求了事是也展者遲延時日如上月
展至下月春季展至夏季愈宕則愈鬆擔遲不擔錯者是也各
省均難免此習氣而直隸則似更甚藩司照轉督院之文有數
月未轉行者總局奉飭核議之件有終歲不議詳者上控之案
飭府先查大概往往經年不報飭縣錄案詳復亦或經年不復
催提錢糧則曰另文批解催提人証則曰傳到卽解宕過數次
上司亦遂置之不問上下相容疲玩已甚前此猶有軍務可諉

本部堂當肅清之後不得不力挽積習與諸君子舍舊圖新以公事之勤惰視同官之賢否除尋常文牘外如催解銀解犯之類均須酌定限期分記功過其四種月報之四柱冊限期送省懸榜官廳至飭道府先查大概之事飭州縣錄案詳復之件亦將限期懸牌官廳違者記過小過積至六次大過積至三次者撤委示懲司道有積壓之文本部堂必面加詰責督署有稽延之牘亦望僚友立進箴規通省上下皆以勤字爲本自有一種旭日初升氣象雖不專爲獄訟而清訟之道必自此始

第二條保定府發審局宜首先整頓 保定發審局雖爲首府之專司而實總督衙門之分局凡京控省控奏交咨交各案總

督獨挈其綱而兩司與首府分任其責若不能詳慎速結則積案日多弊端百出聞京控發交到局委員往提人証間有得錢賣放之弊行賄受託則以患病外出等詞捏稟搪塞此一弊也案証提到省城分別保押聽候審辦有發交清苑取保者縣役任意訛索有發交轅門取保者府役與門丁任意訛索有取店保者店家居奇勒措擇肥而噬此又一弊也每過堂時必有差役承帶案証而承帶之差往往五日一換換差一次講費一次誅求無厭此又一弊也斯三者全賴首府認真防範督院及臬司隨時稽查提犯則刪除閒人專提要証愈少愈好札飭本地方官依限解到不得輕率委員前往取保則再三訪察嚴禁訛

索承帶則一案一差始終不准更換吾輩稍盡一分之心訟者少受一分之苦及發交局員審訊每案只派一員承審一副之凡京控巨案初到時正副二員將卷宗細看過堂一二次尋出端倪開一節略其末卽稍判曲直五日之內臬司帶同首府及正副承審官上院本部堂與之商論一番名曰議獄其應由藩司王稿者兩司帶同首府局員上院議獄議畢再行審訊緊要工夫全在議獄一次及初訊一二堂而案之是非已明矣未過堂之先不妨詳慎訪察旣過堂則須求速了愈速則真情易露愈久則幻態彌多其業已淹滯者尤須設法催辦上司以嚴札催之首府以婉言催之局員以仁心自催之另立限期分記功

過訊結之後取保者飭令速歸管押者立予釋放卽監禁者亦時加檢點惟恐痠瘁首府之滯獄一清通省之風俗立變造福造孽只在吾人寸心一轉移閒耳

第三條州縣須躬親六事不得盡信幕友丁書 牧令爲自古要官百姓之所託命非才德俱優難言稱職然天下安得許多龔黃卓魯萃於一方吾輩與人爲善懸格不可太高但求中材可勉者苟能以勤字爲本事事必躬必親便可造到第一等循吏直隸怠玩之習相沿已久每逢三八告期或委典史收狀或由承發房將呈詞送交門丁門丁積壓數日送交幕友幕友擬批掛榜而本官尙不知呈中所告何事至判閱稿票時任聽丁

曹王政按照呈內姓名全數差傳不敢刪減一名甚至經年累月未嘗坐堂訊問兩造破家蕩產求息訟而不能此小民所以困窮案牘所以叢積也今與諸君約有六事宜躬親者放告之期必須親自收狀能斷者立于斷結不能斷者交幕擬批必須親自細核分別准駁准理者差票傳人必須親自刪減命盜案件以初起供招爲重必須親自勘驗愈速愈妙承審限期何日解勘何日詳結必須親自計算監禁管押之犯常往看視每日牌示頭門每月冊報上司必須親自經理六者皆能躬親則聽訟之道失者寡矣如其怠惰偷安不肯躬親者記過示懲如其識字太少不能躬親者嚴參不貸

第四條禁止濫押頭門懸牌示衆 凡小民初涉訟時原被告彼此忿爭任意混寫多人其中妄扳者居多且有差役勾串牽入呈內者票上之傳人愈多書差之索費愈甚名曰叫點所謂堂上一點硃民間萬點血也嗣後自理詞訟只准一原一被一干証或証至二三人爲止不准多傳傳到人証非命盜大案不准輕於管押只許當堂取保候訊萬不得已而羈押則須隨時親到班館查訪有無凌虐私押等弊仍製造大粉牌一面懸掛頭門之外將在押人姓名逐一開載並註明某月某日因某案管押書明牌上俾衆周知倘書差舞弊私押准家屬喊稟嚴究本部堂常常派人密查如有並未懸牌或牌上人數與在押之

數不符與月報之數不符者記過重懲

第五條禁止書差索費 凡一呈詞到案如有交涉富民及巨商者則差役勾串門丁買此案差票又或下書納賄簽粘原差之名于票尾朦官標判又或家丁求明本官指名簽差此種弊竇無處無之又或原差串通告狀之人伺該差值日方來喊控以爲朋比訛索地步此卽江南所謂坐差也差役持票到門引類呼朋叫囂徵逐婦女出避雞犬不安本家之搜索旣空親族或因而受累及審訊時有坐堂之費將結時有了衙門之費兩造議和者又有和息呈詞之費一字到官百端需索瘡痍赤子其何以堪自今以後各屬當除以上積弊凡簽差皆擇謹愿者

分路酌派不准下書粘簽指請一切規費酌量核減視民家有差騷擾如吾家有差未退視民家有訟糾纏如吾家有訟未結官長設身處地則民間受福無窮此在良有司寸心自儆自修吾不能一一預懸記過之格然訪察得實亦必隨時嚴懲

第六條四種四柱冊按月呈報懸榜 直隸向來章程州縣按月呈報上司者約有五種一曰新舊各案已結未結開摺呈報二曰監禁之犯開摺呈報三曰管押之犯開摺呈報四曰監管病斃者具稟呈報五曰竊賊未獲者具稟呈報每月報此五事立法可謂至密至善矣乃近來不報之縣甚多呈報之縣甚少卽或偶報一月又復間斷數月以致無可稽查今欲清釐獄訟

須將此四種章程認真行之本閣部堂定一格式首日積案上月控者爲舊管本月控者爲新收審結者和息者注銷者爲開除未結者爲實在次日監禁次日管押皆分舊管新收開除實在爲四柱又次日逸犯無論強盜竊賊土匪逃軍凶犯要証但係逃逸應緝者概名之曰逸犯分舊逸新逸已獲在逃爲四柱其逸犯名數未定者則添注日又應緝者幾起每縣每月填寫格式一葉而四種朗然在目矣其每種各開人名事宜清單仍照向例開寫但宜略不宜詳耳州縣於每月初一二三等日辦齊四柱冊四種由驛遞省其偏僻之縣自度驛遞難到者專差送省限十日內送齊院司查對數目釘成總冊存於三處官廳

大衆閱看其未報者報而不實者立予記過其已報者視結案獲犯之遲速監禁管押之多少定該員之功過有過有功者另寫一榜懸於三處官廳此皆本省舊章前督劉公會申明之本閣部堂與諸寮友當力行之

第七條嚴治盜賊以弭隱患 近來盜案迭出搶刼頻仍勒緝嚴比之文書不絕而罕見被獲之犯初二三參之奏咨不絕而終無降調之官卽真正強盜斬犯而再三勘轉狡供駁回亦非四五年不能正法爲從者更逍遙法外毫無畏憚是以盜風日盛邦畿重地萬方輻湊而行旅皆有戒心從前梟匪教匪捻黨降衆餘氛未殄一夫煽動羣盜嘯聚此直隸之隱患也欲弭大

患先除小盜州縣一遇盜案無不責成捕役捕役之能幹者強半通賊本不願於破案一經被獲之後解府解省往返羈留費用半出自捕役捕役應得之工食本官久捐不發解案之費資該役無從措辦此捕快所以藉篆賊爲生路視獲賊爲畏途也嗣後各州縣皆宜厚養捕役工食之外另給月餉恣其所爲譬如良將厚養死士不問千日之過但責一朝之效及至捕案之時購線募人等費官爲給發重懸賞格少者數十金多者每名百金或數百金捕而不獲則又酷刑嚴比血濺肉飛大利在前峻法在後而捕役之不盡力者寡矣旣養捕役以治其標又擇團長以治其本選明幹者數人立爲團長優加禮貌酌給薪資令之

辦捕務約束鄉鄰首告者有賞隱匿者連坐禁賭場以清其
數壑窩家以絕其蹤專講捕盜之實政不尙會緝之虛文既獲
之後分別兩種辦法一種賊少而情輕者仍照舊例招解勘轉
一種賊多而情重者稟請本部堂可否照軍法從事本部堂審
擇要犯批令先行解省委審明確立正軍法劇盜之首速梟羣
賊之膽自破而梟教擒匪之餘黨或亦可弭患無形除具奏外
仰各屬實力遵行其平日不能治本治標臨時不能重賞嚴比
者記過撤參其果能認真緝犯者懸賞之銀每名百金可令獲
犯之人徑來督院領賞卽難解之犯本部堂亦可派兵迎護事
事相諒相助要不使屬員有掣肘處耳

第八條訟案久懸不結核明註銷 鄉曲愚民每因一言參商致起訟端迨事過氣平或經親友勸解又復怨釋悔生彼此情甘罷訟而衙門索和息錢文難以措辦因而避匿遷延久不到案此案懸不結之端一也又有刁民憑空砌詞涉訟或挾仇或漁利造作影響無據之言誣告多人但求准狀不求審理遞呈之後永遠不敢到案此案懸不結之又一端也直隸天津河間此等惡風尤甚若任其經年懸宕則被告干証受累無窮每逢新年開印或值新官到任一概換票一次恐嚇傳提徒爲書差門丁謀利之券實可深恨查例載各衙門告訐人一經批准卽令原告投審若不赴審輒復脫逃及並無疾病事故兩月不到

案聽審者卽將被誣及誣証釋放所告之事不與審理挈獲原告專治以誣告之罪等語嗣後有日久未結各案原告兩月未經呈催卽照原告兩月無故不投審例將案註銷並將差票查緝以清積牘一面將註銷緣由稟聞一面彙入月報冊列於積案開除項下報查

第九條分別卑白嚴辦誣告訟棍 直隸民情樸厚剛直好善之風甲於天下而健訟逞刁者亦復不少或貧民挾仇訛詐砌詞上控希圖拖累富民或莠民聚衆相謀動以錢糧差徭控告官長借大題爲斂錢之計或訟棍扛幫不勝復以詐贓斃命控告書差借延訟爲餽餽之計種種幻態不可言狀一經批飭提

省則奸計得行而無辜受果嗣後省控之案院司不可輕於批准情節支離批詞卽宜斬截不可用姑准飭府查復等語少准一說狀卽多造一陰功其必須准理者不可輕批提省但責成本管知府秉公研訊或委賢明之員前往會訊其提省審辦者則須剖分皂白實究虛坐理無兩是勢不兩存近來直隸京控省控之案一經發交讞局平日則多方彌縫臨結則一味含糊告官得實者承審官迴護同僚但議以不應重不應輕之咎告吏得實者承審官刪改情節但科以笞杖及除名之罪其控告全係虛誣者則又曲庇奸民惟恐反噬但以懷疑妄控及愚民無知等語了結之奏交之案十審九虛刁訟之民十虛九赦問

官皆自命爲和事之人訟棍皆立身於不敗之地皁白不分莫此爲甚自今以往凡京控省控重案本部堂率屬議獄之初卽當確究虛實審實者卽治被告以應得之罪虛誣者卽治奸民以誣告之罪黑白較然不稍含混一變向來麻木不仁之習訟棍之積猾玩法者除照律科斷外再加嚴刑以痛苦之本部堂懲治他犯恪遵律例獨至治盜賊訟棍則當格外從嚴冀以救一時之弊有識者尙鑒亮焉

第十條獎借人才變易風俗 嚴懲訟棍邪氣雖除而正氣不伸則風俗仍難挽回風俗之美惡主持在縣官轉移則在紳士欲厚風俗不得不培養人才古者鄉大夫賓興賢能考其六德

六行六藝而登進之後世風教日頽所謂六德者不可得而見矣至於六行曰孝友睦婣任卹孝友則宗族敬服睦婣則親黨敬服今世未嘗無此等人也任則出力以救急卹則出財以濟窮今世亦未嘗無此等人也六藝曰禮樂射御書數今世取士用文字詩賦經策其事雖異其名曰藝則一也今之牧令卽古鄉大夫之職本有興賢舉能之責本部堂分立三科以求賢士凡孝友爲宗族所信睦婣爲親黨所信者是爲有德之科凡出力以擔當難事出財以襄成義舉者是爲有才之科凡工於文字詩賦長於經解策論者是爲有學之科仰各州縣採訪保舉一縣之中多者五六人少者一二人其全無所舉及舉而不實

者該牧令皆予記過教官如確有所見亦可隨時稟保舉有德者本部堂或寄匾額以旌其宅或延致來省賜之酒食餽之儀物舉有才者本部堂或飭屬派充團長酌給薪水或調省一見札令幫辦捕務舉有學者本部堂或薦諸學使量加獎拔或召之來省肄業優給膏火每州每縣皆有數人爲大吏所知則正氣可以漸伸奸宄因而歛跡此雖與清訟無涉而端本善俗尤在於此用一方之賢士化一方之莠民芳草成林荆棘不鋤而自悴鸞鳳在境鵲巢不逐而自逃諸良吏無以爲迂而忽之

直隸清訟限期功過章程

一催解糧租等銀自奉文之日起限二十日報解登程如以空

言搪塞逾限不解記過一次再勒限若干日清解如再逾違記大過一次 此在事宜第一條

一催解犯證初次酌限若干日初限已滿不解者該州縣記過一次再勒限若干日二限已滿不解者又記過一次再行勒限若干日合計以三箇月爲率仍不解者記大過一次如捏報外出及患病等情或有賄縱情弊另行嚴參如人證在五名以上能於初限內全數提解准記功一次 此在事宜第一條

一飭該管道府廳州先查大概情形之件上司勒限若干日除去行文往返程期屆期不覆者記過一次再勒限若干日仍不覆者或分別記過或另行示懲臨時酌辦至飭各州縣錄案詳

覆之件上司勒限十日除去行文往返程期屆期不覆者記過一次再勒限若干日仍不覆者記大過一次 此在事宜第一條一定例原問官審斷不當或犯供翻易另委賢員審理委員限一箇月定擬院司限一箇月核轉統限兩箇月完結至京控案件定例奏交之案限兩箇月完結委員亦應限一箇月定擬院司亦限一箇月核轉咨交之案限四箇月完結委員亦應限兩箇月定擬院司亦限兩箇月核轉嗣後首府獄局均應恪遵此例凡八年新到之案從四月初一日起如有人卷已齊無故逾限者承審之正委員每案記過一次至道府廳州奉札委審案件由承審衙門於奉文半月內開摺報查另行勒限飭遵 此在

事宜第二條

一七年臘底以前府局承審京控省控之案積壓已至一百三四十起之多嗣後首府獄局應分前後左右四股每股認辦積案三十餘起每月須各完結三起其結案不及三起者合股公同記過一次其結案四起者公同記功一次其結五起以上者記大功一次凡獄局公同記功如一股有三員記功三次卽係每員一功矣記過者亦然有記大功三次者立卽委署一缺并准仿江蘇之例於清訟案內奏獎凡獄局公同記過者出局時卽註銷不與他過一體積算以獄局結獄不易賞宜重而罰宜輕也 此在事宜第二條

一相驗屍身須卽日親往驗訊明確如無故逾延一兩日者記過一次如或委佐雜代驗或任令刑仵滋弊或因遲久始驗以致屍身腐爛供情游移者每案記大過一次三八告期不親自收狀者記過一次所謂六事宜躬親者惟此兩事易於訪查故特爲指出 此在事宜第三條

一管押人犯并不開明名姓事由月日懸牌示衆者記過一次因而書差舞弊私押者記大過一次或雖懸牌而牌上所開之人與在押及月報之數不符者亦記大過一次 此在事宜第四條

一尋常命案定例自獲犯之日起州縣限三箇月審擬招解斬

絞立決命案州縣限兩箇月審擬招解大小盜案定例自獲犯之日起州縣限兩箇月審擬招解軍流以下徒罪以上雜案定例限兩箇月審擬詳解州縣自理詞訟定例限二十日完結自同治八年四月起均應恪遵部例不准違逾如有逾限一箇月記過一次逾三箇月記大過一次其例應兩箇月擬解者逾限四箇月其例應三箇月擬解者逾限五箇月均再記大過二次此在大事宜第六條

一四種冊中積案上月日舊管本月日新收此指本年言之也若合前數年言之則當以七年臘底以前者爲舊案以八年元旦以後者爲新案嗣後各州縣清釐積案招解者每月應結二

案不滿二案者記過一次結三四案者記功一次結五案以上者記大功一次自理者缺分繁簡不同積案多寡不一統限於八年臘底將七年臘底舊案辦畢其每月應結若干案由各州縣自行酌定數目於奉文半箇月稟覆俟稟到日另行核示此在事宜第六條

一四種月報四柱冊上月之冊於下月初一二三等日開報十三日送齊到省如開報遲延逾限至十日者記過一次若玩違不報或雖報而遺漏外錯滿十起以上者記大過一次此在事宜第六條

一州縣平日不能講求捕務境內出強盜劫案一月劫至二起

者記過一次一月劫至三起者記大過一次本境有盜窩不能查拏追被鄰封拏獲僅以協獲等詞飾稟者記大過一次餘均照定例揭參如有拏獲鄰境盜犯破獲鄰境盜窩者除照例奏獎外每案准記大功一次

此在事宜第七條

一州縣所屬士民於才德學三科內全無所舉及舉而不實者均記過一次如舉得其人記功一次

此在事宜第十條

一記大過至三次記小過至六次者現任人員立予撤任候補人員停委二年有功准其抵銷其記大功至三次記小功至六次者現任實缺之員彙案奏請酌獎署事人員交卸時立即另行委署候補人員立予超班委署

此酌定功過總例

一各屬關係清訟之文書各蓋一戳云清訟要件限日行一百里經過接遞之縣於封面寫明某日某刻過某縣某處以便稽查如不及百里或未經註寫者記過一次各府州縣接院司勒限查覆之件如驛遞遲延亦卽稟請飭查記過

此因限期酌定驛遞之例

一審轉限期命案院司各限一箇月盜案院司各限二十日凡州縣長解在省守候發犯如未滿各上司審轉限期卽行脫逃者僉差官記過一次若甫滿審轉限期不候上司吩咐先行脫逃者僉差官亦記過一次仍勒限派役來省押解

此附記臬司詳定章程

禁止私押告示式

各屬辦法恐難盡一故定告示之式

爲奉文曉示禁止私押事照得本州辦理案件隨到隨審隨審隨結惟案內訊有訊供未確或証佐未齊不能不管押候質無如差役舞弊或提到而匿不稟明或訊釋而私押索費且有以扭交指交爲名原告串差私自管押隨後具呈以爲欺懦之計種種弊竇相習成風今奉札嚴行查禁合亟牌示爲此示仰諸色人等知悉嗣後管押人證本州必於當時牌示註明日期及至開釋亦必立刻牌示俾衆周知如有示內無名及已登註開釋原差仍行私押准該家屬人等喊稟以憑嚴究特示

計開

收押項下

按名登註某月某日因某案收押

開除項下

按名登註某月某日或訊釋或交保或押後收禁等項逐

一開明

緝盜

直隸爲畿輔重地萬方輻輳梟匪教匪騎馬賊黨及捻匪遺孽游勇降衆匿散民間者不一而足一值機有可乘卽萌故志一夫煽動羣醜立應公莅任後接據滄州河間等十餘州縣紛紛稟報有騎馬持械之賊乘間蠢動竄鹽搶灘肆劫拒捕晝散

夜聚公檄飭記名臬司劉盛藻派隊分巡曲周威縣廣宗清河
一帶檄銘軍營務處趙宗道派隊分巡河間獻縣深州冀州一
帶檄天津鎮陳濟清派隊分巡滄州青縣鹽山慶雲一帶檄記
名總兵劉祺派隊分巡景州阜城東光吳橋一帶仍檄各州縣
選差緝拏與各營會同搜捕因疏稱現值天氣亢旱人心惶惶
若令地方官擒拏獲匪犯後仍照例勘轉不特使曠悍之徒久
稽顯戮且羈禁在獄解審在途設有疏虞轉致罪大惡極之徒
又漏法網在在堪虞溯查咸豐七年間經前督臣譚廷襄奏奉
諭旨將拏獲大夥梟犯卽照拏獲土匪章程先行就地正法如
遇拒捕格殺勿論又咸豐十一年間經前督臣文煜奏准拏獲

騎馬賊匪土匪訊明後卽行就地正法數年來地方賴以稍安
今直隸雖非軍務省分而伏莽尙多若非因時制宜從嚴執法
不足以彌隱患與其臨時辦理多所顧忌自應先事援請俾有
遵循擬請嗣後拏獲梟匪土匪擾害鄉里橫行搶劫勒索資財
者以及騎馬持械倚強肆掠兇暴衆著者降擒游勇聚黨夥劫
者仍照歷次奏定章程由地方官審訊具稟督撫批飭該管府
州親往覆訊後卽行就地正法其臨時拒捕者格殺勿論似此
從嚴懲創庶匪徒知所做畏仍俟盜賊衰息再行奏明遵照舊
章解勘辦理奉

旨允行七月公疏陳直晉豫三省會哨章程六條畧云臣查直

隸正定順德廣平等府迤西邊界與晉豫二省毗連其間山嶺重疊路徑紛歧匪徒最易藏匿且三省連界犬牙相錯一經查緝不免此拏彼竄茲據總局司道遵擬會哨章程詳請核辦前來臣覆加確核尙屬周妥其有未盡事宜仍須隨時酌定務期立法周密使匪徒無可託足一律聞風斂敢庶以仰慰朝廷除暴安良之至意

直晉豫三省毗連各州縣約期會哨章程

一會哨不必拘定地而也查直晉豫三省交界之處山嶺叢雜往來通行路徑不一接壤州縣每月會哨一次務須先期酌定地方彼此約訂如上次在此地會哨下次卽在彼處會哨不必

拘定地面庶山陬僻壤躬親遍歷免致顧此失彼平日仍應會同營汛選派兵役不分畛域認真巡邏務期有犯必獲毋稍縱漏

一接壤州縣應會銜出示曉諭也查匪徒匿跡山巖地連三省不免此拏彼竄以致破獲爲難茲旣飭令會哨自應不分畛域一體查拏第恐鄉保人等未能周知或因隔省呼應不靈甚至地棍土豪從中撓阻諸形掣肘應令接壤州縣會銜會印剴切出示在於交界處所遍貼曉諭并於會哨時面諭鄉地人等嗣後緝匪事宜務須聲氣相聯不得稍存此疆彼界之見違者究懲不貸

一地方文武宜輪流巡哨也查交界之處多係崇山峻嶺雖云接壤其間自數十里至一二百里不等寫遠之區往返卽須三四日州縣公事較多恐不能按月巡哨應令該管軍汛分任其事遞相輪流各專責成而免推諉

一會哨宜聯絡鄉團也匪徒以巖谷爲巢穴而山徑險仄每有人跡罕到之處非土著居民不能熟悉路徑州縣會哨宜與各處鄉團聯絡務使聲息相通遇有匪徒嘯聚彼此密約各帶兵役會合鄉團以熟悉路徑者爲導引迅速掩捕庶可悉數破獲不致此擎彼竄

一接壤之處不分鄰省本省一律會哨也查正定府屬之贊皇

元氏平山靈壽井陘阜平順德府屬之內邱邢臺沙河廣平府屬之永年邯鄲磁州等州縣俱與晉豫二省界連固應遵照巡哨卽本省州縣交界地方亦多深山窮谷最易藏奸應令一體定期會哨以昭周密

一會哨應飭按月稟報也查緝匪本係地方文武之責總宜實力奉行不得稍有懈弛每次會哨卽將情形查考并令本管各府隨時稽查如有虛應故事以空文稟報塞責先行記過示懲倘始終懈忽致境內仍有匪徒出沒者從重撤參

求闕齋弟子記卷二十七